

Disposición derradeira segunda. *Habilitación de medios.*

Para a posta en marcha e funcionamento do Fondo para a Adquisición de Activos Financeiros será dotado de cantos medios materiais e persoais sexan necesarios.

Disposición derradeira terceira. *Vixencia do Fondo para a Adquisición de Activos Financeiros.*

O Consello de Ministros, atendendo ás circunstancias económicas e logo de informe da Comisión Delegada de Asuntos Económicos, poderá acordar a extinción e liquidación do Fondo para a Adquisición de Activos Financeiros.

Disposición derradeira cuarta. *Entrada en vigor.*

Este real decreto lei entrará en vigor o día seguinte ao da súa publicación no «Boletín Oficial del Estado».

Dado en Madrid o 10 de outubro de 2008

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO

16485 *REAL DECRETO LEI 7/2008, do 13 de outubro, de medidas urxentes en materia económico-financiera en relación co Plan de acción concertada dos países da zona euro. («BOE» 248, do 14-10-2008.)*

Para faceren fronte aos efectos da crise financeira internacional, os gobernos europeos, e en particular o Goberno español, viñeron adoptando un conxunto de medidas excepcionais. En concreto, o Consello de Ministros de Economía e Finanzas da Unión Europea do día 7 de outubro asumiu o compromiso de adoptar todas as medidas que foren necesarias para preservar a estabilidade do sistema financeiro, e acordou as liñas xerais de actuación coordinada entre os Estados membros. As devanditas medidas débense axustar aos principios de intervención oportuna e limitada no tempo, protección dos intereses dos contribuíntes e respecto ás regras do mercado interior europeo. O obxectivo último destas orientacións é permitir que os fluxos de crédito poidan chegar con normalidade a familias e empresas, de forma que as decisións de consumo, aforro e investimento poidan ter lugar nun ámbito adecuado.

Neste contexto, o Goberno adoptou medidas encamiñadas a impulsar o financiamento a empresas e cidadáns por parte das entidades de crédito, unindo, ás medidas previamente adoptadas, a aprobación, o pasado 10 de outubro, dun real decreto lei polo que se aproba a creación do Fondo de Adquisición de Activos Financeiros, e dun real decreto que reforza a protección dos depositantes e investidores nas nosas entidades de crédito e empresas de servizos de investimentos.

A situación dos mercados nos últimos días e o risco que implica para a estabilidade do sistema financeiro internacional fan necesaria unha resposta adicional, decidida e coordinada por parte dos gobernos europeos.

Así, os xefes de Estado e de Goberno da área euro, na súa reunión do pasado 12 de outubro, insistiron na relevancia de abordar os persistentes problemas de

financiamento bancario que se están a observar e os seus efectos sobre a economía real. Neste sentido decidiron, en liña coas conclusións do Ecofin do 7 de outubro, comprometerse a actuar de forma coordinada co Banco Central Europeo cos seguintes obxectivos: asegurar condicións de liquidez apropiadas para o funcionamento das institucións financeiras; facilitar acceso ao financiamento por parte das institucións financeiras; establecer mecanismos que permitan, de ser o caso, prover recursos de capital adicional ás entidades financeiras que aseguren o funcionamento da economía; asegurar que a normativa contable é suficientemente flexible para tomar en consideración as excepcionais circunstancias actuais dos mercados; e reforzar e mellorar os mecanismos de coordinación entre os países europeos.

Para atender a estes obxectivos acordouse que os gobernos faciliten por un período de tempo limitado ata o 31 de decembro de 2009, directa ou indirectamente e en condicións de mercado, avais, seguros ou instrumentos similares que permitan garantir as novas emisións de débeda bancaria a medio prazo. Ademais, os gobernos comprometéronse a garantir a liquidez das institucións financeiras, a reforzar a súa estrutura de capital alí onde sexa necesario e a facilitar o financiamento do sistema financeiro no medio prazo.

Este real decreto lei aproba o mecanismo que pon en marcha o disposto no acordo europeo citado, tendo en conta as circunstancias do sistema financeiro español e as medidas xa aprobadas nesta dirección o pasado 10 de outubro.

En primeiro lugar, para restablecer a confianza e o bo funcionamento do mercado de financiamento das entidades de crédito, este real decreto lei autoriza o outorgamento de avais do Estado ás operacións de financiamento novas que realicen as entidades de crédito residentes en España. Para iso, establécese que durante o ano 2008 se poderán conceder avais ata un importe máximo de 100.000 millóns de euros, considerándose incrementado na devandita contía o límite establecido no artigo 54 da Lei 51/2007, do 26 de decembro, de orzamentos xerais do Estado para o ano 2008; e no proceso de tramitación nas Cortes Xerais da Lei de orzamentos xerais do Estado para o ano 2009, será necesario establecer un incremento do límite de avais que permita aplicar as medidas previstas neste real decreto lei. Ademais, en segundo lugar, autorízase con carácter excepcional a adquisición de títulos aptos para o reforzamento dos recursos propios das entidades de crédito.

A urxencia da aprobación desta norma deriva da situación dos mercados nos últimos días e do risco que implica para a estabilidade do sistema financeiro internacional, que fixeron necesaria unha resposta adicional, decidida e coordinada por parte dos gobernos europeos, que se debe trasladar inmediatamente ao ordenamento xurídico español.

En virtude da urxencia da adopción das medidas, para permitir a súa inmediata efectividade, facendo uso da autorización contida no artigo 86 da Constitución española, por proposta da vicepresidenta primeira do Goberno e ministra da Presidencia, por suplencia do vicepresidente segundo do Goberno e ministro de Economía e Facenda, e logo de deliberación de Consello de Ministros na súa reunión extraordinaria do día 13 de outubro de 2008,

DISPONGO:

Artigo 1. *Autorización para o outorgamento de avais a operacións de financiamento.*

1. Este real decreto lei ten por obxecto autorizar o outorgamento de avais do Estado ás operacións de

financiamento novas que realicen as entidades de crédito residentes en España a partir da entrada en vigor deste real decreto lei.

No caso de filiais de entidades estranxeiras exixírase que desenvolvan unha actividade significativa en España.

2. Para os efectos deste real decreto lei, entenderanse por operacións de financiamento as emisións de obrigas de pagamento, bonos e obrigas admitidas a negociación en mercados secundarios oficiais españois.

O aval poderase estender, se é o caso, a outros instrumentos bancarios, tales como os depósitos interbancarios, no marco dun esquema concertado e coordinado entre os gobernos da zona euro.

3. O prazo máximo de vencemento das operacións a que se refire o punto anterior será de cinco anos.

4. Para acceder ao outorgamento dos avais, as entidades de crédito deberán cumprir os requisitos que establece o ministro de Economía e Facenda, entre os cales se poderán incluír aquelas condicións especiais de solvencia que propoña o Banco de España.

5. O prazo de outorgamento de avais finalizará o 31 de decembro de 2009.

6. No ano 2008 poderanse conceder avais ata un importe máximo de 100.000 millóns de euros, considerándose incrementado na devandita contía o límite establecido no artigo 54 da Lei 51/2007, do 26 de decembro, de orzamentos xerais do Estado para o ano 2008.

7. Os avais serán outorgados polo ministro de Economía e Facenda de acordo cos requisitos establecidos na Lei xeral hipotecaria e xerarán unha comisión que reflecta o risco que asuma o Estado en cada operación.

Artigo 2. *Autorización para a adquisición de títulos para o reforzamento dos recursos propios.*

1. Con carácter excepcional, e ata o 31 de decembro de 2009, autorízase o ministro de Economía e Facenda para a adquisición de títulos emitidos polas entidades de crédito residentes en España que necesiten reforzar os seus recursos propios e así o soliciten, incluíndo participacións preferentes e cotas participativas.

2. Os títulos que adquira o Estado no contexto deste real decreto lei non estarán sometidos ás limitacións que a lei establece para a computabilidade dos recursos propios.

3. Os acordos de adquisición adoptaranse logo de informe do Banco de España.

Disposición derradeira primeira. *Habilitación normativa.*

Autorízase o ministro de Economía e Facenda para ditar as normas que resulten necesarias para a aplicación e desenvolvemento do previsto neste real decreto lei.

Disposición derradeira segunda. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 13 de outubro de 2008.

JUAN CARLOS R.

O presidente do Goberno,
JOSÉ LUIS RODRÍGUEZ ZAPATERO

MINISTERIO DA PRESIDENCIA

16722 *ORDE PRE/2957/2008, do 10 de outubro, pola que se inclúen no anexo I do Real decreto 2163/1994, do 4 de novembro, polo que se implanta o sistema harmonizado comunitario de autorización para comercializar e utilizar produtos fitosanitarios, as substancias activas fludioxonil, clomazona, prosulfocarb, amidosulfurón, nicosulfurón, cloridazona, bentiavalicarb, boscalida, carvone, fluoxastrobin, Paecilomyces lilacinus, protioconazol e se amplía o uso da substancia activa metconazol. («BOE» 251, do 17-10-2008.)*

A Directiva 91/414/CEE do Consello, do 15 de xullo de 1991, relativa á comercialización de produtos fitosanitarios, inclúe no seu anexo I as substancias activas que foron autorizadas para a súa incorporación nos produtos fitosanitarios. A devandita directiva incorpórase ao ordenamento xurídico español en virtude do Real decreto 2163/1994, do 4 de novembro, polo que se implanta o sistema harmonizado comunitario de autorización para comercializar e utilizar produtos fitosanitarios. Por outra banda, na Orde do 14 de abril de 1999 establece o anexo I do devandito real decreto, baixo a denominación «Lista comunitaria de substancias activas», que se define no artigo 2.16 do devandito real decreto, como a lista das substancias activas de produtos fitosanitarios aceptadas pola Comisión Europea e cuxa incorporación se fará pública mediante disposicións nacionais, ditadas ao abeiro das correspondentes normas comunitarias.

A Directiva 91/414/CEE do Consello, do 15 de xullo de 1991, foi modificada por sucesivas directivas co fin de incluír no seu anexo I determinadas substancias activas. Así, mediante a Directiva 2007/76/CE, do 20 de decembro, inclúense as substancias activas fludioxonil, clomazona e prosulfurón, pola Directiva 2008/40/CE, do 28 de marzo, inclúense as substancias activas amidosulfurón e nicosulfurón, pola Directiva 2008/41/CE, do 31 de marzo, inclúese a substancia activa cloridazona, pola Directiva 2008/44/CE, do 4 de abril, inclúense as substancias activas bentiavalicarb, boscalida, carvone, fluoxastrobin, Paecilomyces lilacinus e protioconazol.

Pola súa vez, á Directiva 2008/45/CE, do 4 de abril, pola que se modifica a Directiva 91/414/CEE do Consello, do 15 de xullo de 1991, respecto á ampliación do uso da substancia activa metconazol.

As disposicións citadas establecen as condicións para que a comercialización de produtos fitosanitarios que conteñan as referidas substancias activas non teñan efectos nocivos para a saúde humana ou a saúde animal nin para as augas subterráneas, nin teñan repercusións inaceptables para o ambiente, así como para que se revisen as autorizacións existentes de produtos fitosanitarios que conteñan algunha das substancias activas que se inclúen no anexo I do Consello, do 15 de xullo de 1991, modificándoas ou retirándoas, de conformidade co establecido para o efecto na devandita directiva.

Esta orde incorpora ao ordenamento xurídico interno as directivas 2007/76/CE da Comisión, do 20 de decembro; 2008/40/CE da Comisión, do 28 de marzo; 2008/41/CE da Comisión, do 31 de marzo; 2008/44/CE da Comisión, do 4 de abril e 2008/45/CE da Comisión, do 4 de abril, mediante a inclusión das substancias activas fludioxonil, clomazona, prosulfocarb, amidosulfurón, nicosulfurón, cloridazona, bentiavalicarb, boscalida, carvone, fluoxastrobin, Paecilomyces lilacinus, protioconazol e a ampliación de uso de metconazol no anexo I do Real decreto